



稗編
八

庫	文	閣	漢
一五三函	三〇〇九	六〇	書
七	冊	號	類



三〇〇九	漢
六〇	書
一七	冊

內閣文庫	
番號	漢 3009
冊數	60 (7)
函號	366 65





新刊唐荆川先生稗編卷之序

後學東海茅一相校

詩一

詩大序

卜商

詩者志之所之也在心為志發言為詩情動于中而形于言之不足故嗟歎之嗟歎之不足故詠歌之詠歌之不足不知手之舞之足之蹈之也情發于聲聲成文謂之音治世之音安以樂其政和亂世之音怨以怒其政乖亡國之音哀以思其民困故正得失動天地感鬼神莫近於詩先王以是經夫婦成孝敬

荆川稗編

卷之序

一

厚人倫美教化移風俗故詩有六義焉一曰風二曰賦三曰比四曰興五曰雅六曰頌上以風化下下以風刺上主文而譎諫言之者無罪聞之者足以戒故曰風至于王道衰禮義廢政教失國異政家殊俗而變風變雅作矣國史明乎得失之迹傷人倫之變哀刑政之苛吟詠性情以風其上達于事變而懷其舊俗者也故變風發乎情止乎禮義發乎情民之性也止乎禮義先王之澤也是以一國之事繫一人之本謂之風言天下之事形四方之風謂之雅雅者正也言王政之所由廢興也政有小大故有小雅焉有大雅焉頌者美盛德之形容以其成功告于神明者是謂四始詩之至也

詩序辯

朱熹

詩序之作說者不同或以爲孔子或以爲子夏或以爲國史皆無明文可考唯後漢書儒林傳以爲衛宏作毛詩序今傳於世則序乃宏作明矣然鄭氏又以爲諸序本自合爲一編毛公始分以真諸篇之首則是毛公之前其傳已久宏特增廣而潤色之耳故近世諸儒多以序之首句爲毛公所分而其下推說云云者爲後人所益理或有之但今考其首句則已有

不得詩人之本意而肆爲妄說者矣况沿襲云云之誤哉然計其初猶必自謂出於臆度之私非經本文故且自爲一編別附經後又以尚有齊魯韓氏之說並傳於世故讀者亦有以知其出於後人之手不盡信也及至毛公引以入經乃不綴篇後而超冠篇端不爲注文而直作經字不爲疑辭而爲決辭其後三家之傳又絕而毛說孤行則其牴牾之迹無復可見故此序者遂若詩人先所命題而詩文反爲因序以作於是讀者傳相尊信無敢擬議至於有所不通則必爲之委曲遷就穿鑿而附合之寧使經之本文繚

戾破碎不成文理而終不恐明以小序爲出於漢儒也愚之病此久矣然猶以其所從來也遠其間容或真有傳授證驗而不可廢者故旣頗采以附傳中而復弁爲一編以還其舊因以論其得失云

大序國史明乎得失之迹傷人倫之變哀刑政之苛吟詠情性以風其上達於事變而懷其舊俗者也

詩之作或出於公卿大夫或出於匹夫匹婦蓋非一人而序以爲專出於國史則誤矣說者欲蓋其失乃云國史紬繹詩人之情性而歌詠之以風其上則不

唯文理不通而考之周禮太史之屬掌書而不掌詩其誦詩以諫乃太師之屬瞽矇之職也故春秋傳曰史爲書瞽爲詩說者之云兩失之矣

小序是以關雎樂得淑女以配君子憂在進賢不淫其色哀窈窕思賢才而無傷善之心焉是關雎之義也

按論語孔子嘗言關雎樂而不淫哀而不傷蓋淫者樂之過傷者哀之過獨爲是詩者得其情性之正是以哀樂中節而不至於過耳而序者乃析哀樂淫傷各爲一事而不相湏則已失其旨矣至於傷爲傷善

之心則又大失其旨而全無文理也或曰先儒多以周道衰詩人本諸衽席而關雎作故楊雄以周康之時關雎作爲傷始亂杜欽亦曰佩玉晏鳴關雎歎之說者以爲古者后夫人鷄鳴佩玉去君所周康后不然故詩人歎而傷之此魯詩說也與毛異矣但以哀而不傷之意推之恐其有此理也曰此不可知矣但儀禮以關雎爲鄉樂又爲房中之樂則是周公制作之時已有此詩矣若如魯說則儀禮不得爲周公之書儀禮不爲周公之書則周之盛時乃無鄉射燕飲房中之樂而必有待乎後世之刺詩也其不然也明

矣且爲人子孫乃無故而播其先祖之失於天下如此而尚可以爲風化之首乎

騶虞鵲巢之應也鵲巢之化行人倫既正朝廷既治天下純被文王之化則庶類蕃殖蒐田以時仁如騶虞則王道成也

此序得詩之大指然語意亦不分明楊氏曰二南正始之道王化之基蓋一體也王者諸侯之風相須以爲治諸侯所以代其終也故召南之終至於仁如騶虞然後王道成焉夫王道成非諸侯之事也然非諸侯有騶虞之德亦何以見王道之成哉歐陽公曰賈

誼新書曰騶者文王之囿名虞者囿之司獸也陳氏曰禮記射義云天子以騶虞爲節樂官備也則其爲虞官明矣獵以虞爲主其實歎文王之仁而不斥言也此與舊說不同今存於此

栢舟言仁而不遇也衛頃公之時仁人不遇小人在側

詩之文意事類可以思而得其時世名氏則不可以強而推故凡小序唯詩文明白直指其事如其棠定中南山株林之屬若證驗的切見於書史如載馳碩人清人蓄鳥之類決爲可無疑者其次則詞旨大槩

可知必爲某事而不可知其的爲某時某人者尚多有之若爲小序者姑以其意推尋探索依約而言則雖有所不知亦不害其爲不自欺雖有未當人亦當恕其所不及今乃不然不知其時者必強以爲某王某公之時不知其人者必強以爲某甲某乙之事於是傳會書史依託名謚鑿空妄語以誑後人其所以然者特以耻其有所不知而惟恐人之不見信而已且如柏舟不知其出於婦人而以爲男子不知其不得於夫而以爲不遇於君此則失矣然有所不及而不自欺則亦未至於大害理也今乃斷然以爲衛頃

公之時則其故爲欺罔以誤後人之罪不可揜矣蓋其偶見此詩冠於三衛變風之首是以求之春秋之前而史記所書莊宣以上衛之諸君事皆無可考者謚亦無甚惡者獨頃公有賂王請命之事其謚又爲甄心動懼之名如漢諸侯王必其嘗以罪謫然後加以此謚以此意其必有棄賢用佞之失而遂以此詩予之若將以銜其多知而必於取信不知將有明者從旁觀之則適所以暴其真不知而啓其深不信也凡小序之失以此推之什得八九矣又其爲說必使詩無一篇不爲美刺時君國政而作固已不切於情

性之自然而又拘於時世之先後其或書傳所載當此之時偶無賢君美謚則雖有辭之美者亦例以為陳古而刺今是使讀者疑於當時之人絕無善則稱君過則稱已之意而一不得志則扼腕切齒嘻笑冷語以對其上者所在而成羣是其輕躁險薄尤有害於溫柔敦厚之教故予不可以不辯

桑中刺奔也衛之公室淫亂男女相奔至於世族在位相竊妻妾期於幽遠政散民流而不可止此詩乃淫奔者所自作序之首句以為刺奔誤矣其下云云者乃復得之樂記之說已略見本篇矣而或

者以為刺詩之體固有鋪陳其事不加一辭而閔惜懲創之意自見於言外者此類是也豈必譙讓質責然後為刺也哉此說不然夫詩之為刺固有不加一辭而意自見者清人猗嗟之屬是已然嘗試玩之則其賦之之人猶在所賦之外而詞意之間猶有賓主之分也豈有將欲刺人之惡乃反自為彼人之言以陷其身於所刺之中而不自知也哉其必不然也明矣又况此等之人安於為惡其於此等之詩計其平日固已自其口出而無慚矣又何待吾之鋪陳而後始知其所為之如此亦豈畏吾之憫惜而遂幡然遽

有懲創之心耶以是爲刺不惟無益殆恐不免於鼓
之舞之而反以勸其惡也或者又曰詩三百篇皆雅
樂也祭祀朝聘之所用也桑間濮上之音鄭衛之樂
也世俗之所用也雅鄭不同部其來尚矣且夫子答
顏淵之問於鄭聲亟欲放而絕之豈其刪詩乃錄淫
奔者之詞而使之合奏於雅樂之中乎亦不然也雅
者二雅是也鄭者緇衣以下二十一篇是也衛者邶
鄘衛三十九篇是也桑間衛之一篇桑中之詩是也
二南雅頌祭祀朝聘之所用也鄭衛桑濮里巷狎邪
之所歌也夫子之於鄭衛蓋深絕其聲於樂以爲法

而嚴立其詞於詩以爲戒如聖人固不語亂而春秋
所記無非亂臣賊子之事蓋不如是無以見當時風
俗事變之實而垂鑒戒於後世固不得已而存之所
謂道並行而不相悖者也今不察此乃欲爲之諱其
鄭衛桑濮之實而文之以雅樂之名又欲從而奏之
宗廟之中朝廷之上則未知其將以薦之何等之鬼
神用之何等之賓客而於聖人爲邦之法又豈不爲
陽守而陰叛之耶其亦誤矣曰然則大序所謂止乎
禮義夫子所謂思無邪者又何謂耶曰大序指栢舟
綠衣泉水竹竿之屬而言以爲多出於此耳非謂篇

篇皆然而桑中之類亦非乎禮義也夫子之言正爲
人有邪正美惡之雜故特言此以明其皆可懲惡勸
善而使人得其性情之正耳非以桑中之詩亦以無
邪之思作之也曰荀卿所謂詩者中聲之所止太史
公亦謂三百篇者夫子皆絃歌之以求合於韶武之
音何邪曰荀卿之言固爲正經而發若史遷之說則
恐亦未足爲據也豈有哇淫之曲而可以強合於韶
武之音也耶

考繁刺莊公也不能繼先公之業使賢者退而窮
處

此爲美賢者窮處而能安其樂之詩文意甚明然詩
文未有見棄於君之意則亦不得爲刺莊公矣序蓋
失之而未有害於義也至於鄭氏遂有誓不忘君之
惡誓不過君之朝誓不告君以善之說則其害義又
有甚焉於是程子易其訓詁以爲陳其不能忘君之
意陳其不得過君之朝陳其不得告君以善則其意
忠厚而和平矣然未知鄭氏之失生於序文之誤若
但直據詩詞則與其君初不相涉也

有女同車刺忽也鄭人刺忽之不昏於齊太子忽
嘗有功於齊齊侯請妻之齊女賢而不取卒以無

大國之助至於見逐故國人刺之

按春秋傳齊侯欲以文姜妻鄭太子忽忽辭人問其故忽曰人各有耦齊大非吾耦也詩曰自求多福在我而已大國何爲其後北戎侵齊鄭伯使忽帥師救之敗戎師齊侯又請妻之忽曰無事於齊吾猶不敢今以君命奔齊之急而受室以歸是以師昏也民其謂我何遂辭諸鄭伯祭仲謂忽曰君多內寵子無大援將不立忽又不聽及即位遂爲祭仲所逐此序文所據以爲說者也然以今考之此詩未必爲忽而作序者但見孟姜二字遂指以爲齊女而附之於忽耳

假如其說則忽之辭昏未爲不正而可刺至其失國則又特以勢孤援寡不能自定亦未有可刺之罪也序乃以爲國人作詩以刺之其亦誤矣後之讀者又襲其誤必欲煅煉羅織文致其罪而不肯赦徒欲以徇說詩者之謬而不知其失是非之正害義理之公以亂聖經之本指而壞學者之心術故予不可以不辯

狡童刺忽也不能與賢人圖事權臣擅命也

昭公嘗爲鄭國之君而不幸失國非有大惡使其民疾之如寇讐也况方刺其不能與賢人圖事權臣擅

命則是公猶在位也豈可忘其君臣之分而遽以狡童目之耶且昭公之爲人柔懦踈闊不可謂狡即位之時年已壯大不可謂童以是名之殊不相似而序於山有扶蘇所謂狡童者方指昭公之所美至於此篇則遂移以指公之身焉則其舛又甚而非詩之本指明矣大抵序者之於鄭詩凡不得其說者則舉而歸之於忽文義一失而其害於義理有不可勝言者一則使昭公無辜而被謗二則使詩人脫其淫詭之實罪而麗於訕上悖理之虛惡三則厚誣聖人刪述之意以爲實賤昭公之守正而深與詩人之無禮於

其君凡此皆非小失而後之說者猶或主之其論愈精其害愈甚學者不可以不察也

無衣美晉武公也武公始并晉國其大夫爲之請命乎天子之使而作是詩也

序以史記爲文詳見本篇但此詩若非武公自作以述其賂王請命之意則詩人所作以著其事而陰刺之耳序乃以爲美之失其旨矣且武公弑君篡國大逆不道乃王法之所必誅而不赦者雖曰尚知王命之重而能請之以自安是亦禦人於白晝大都之中而自知其罪之甚重則分薄賊餌貪吏以求私有其

重寶而免於刑戮是乃猾賊之尤耳以是爲美吾恐其獎姦誨盜而非所以爲教也小序之陋固多然其顛倒順逆亂倫悖理未有如此之甚者故予特深辯之以正人心以誅賊黨意庶幾乎大序所謂正得失者而因以自附於春秋之義云

大雅文王文王受命作周也

受命受天命也作周造周室也文王之德上當天心下爲天下所歸往三分天下而有其二則已受命而作周矣武王繼之遂有天下亦卒文王之功而已然漢儒惑於讖緯始有赤雀丹書之說又謂文王因此

遂稱王而改元殊不知所謂天之所以爲天者理而已矣理之所在衆人之心而已矣衆人之心是非向背若出於一而無一毫私意雜於其間則是理之自然而天之所以爲天者不外是矣今天下之心旣以文王爲歸矣則天命將安往哉書所謂天視自我民視天聽自我民聽所謂天聰明自我民聰明天明畏自我民明畏皆謂此耳豈必赤雀丹書而稱王改元哉稱王改元之說歐陽公蘇氏游氏辯之已詳去此而論則此序本亦得詩之太旨而於其曲折之意有所未盡已論於本篇矣

抑衛武公刺厲王亦以自警也

此詩之序有得有失蓋其本例以爲非美非刺則詩無所爲而作又見此詩之次適出於宣王之前故直以爲刺厲王之詩又以國語有左史之言故又以爲亦以自警以詩考之則其曰刺厲王者失之而曰自警者得之也夫曰刺厲王之所以爲失者史記衛武公卽位於宣王之三十六年不與厲王同時一也詩以小子目其君而爾汝之無人臣之禮與其所謂敬威儀慎出話者自相背戾二也厲王無道貪虐爲甚詩不以此箴其膏肓而徒以威儀詞令爲諄切之戒

緩急失宜三也詩詞倨慢雖仁厚之君有所不能容者厲王之暴何以堪之四也或以史記之年不合而以爲追刺者則詩所謂聽用我謀庶無大悔非所以望於既往之人五也曰自警之所以爲得者國語左史之言一也詩曰謹爾侯度二也又曰聿喪厥國三也又曰亦聿旣耄四也詩意所指與淇奧所美賓筵所悔相表裏五也二說之得失其佐驗明白如此必去其失而取其得然後此詩之義明今序者乃欲合而一之則其失者固已失之而其得者亦未足爲全得也然此猶自其詩之外而言之也若但卽其詩之

芥川神編 卷之八
本文而各以其一說反覆讀之則其訓義之顯晦疎密意味之厚薄淺深可以不待考證而判然於胸中矣此又讀詩之簡要直訣學者不可以不知也

昊天有成命郊祀天地也

此詩詳考經文而以國語證之其爲康王以後祀成王之詩無疑而毛鄭舊說定以頌爲成王之時周公所作故凡頌中有成王及成康字者例皆曲爲之說以附已意其迂滯僻澁不成文理甚不難見而古今諸儒無有覺其謬者獨歐陽公著時世論以斥之其辯明矣然讀者狃於舊聞亦未遽肯深信也小序又

以此詩篇首有昊天二字遂定以爲郊祀天地之詩諸儒往往亦襲其誤殊不知其首言天命者止於一句次言文武受之者亦止一句至於成王以下然後詳說不敢康寧緝熙安靜之意乃至五句而後已則其不爲祀天地而爲祀成王無可疑者又况古昔聖王制爲祭祀之禮必以象類故祀天於南祭地於北而其壇壝樂舞噐幣之屬亦各不同若曰合祭天地於圜丘則古者未嘗有此瀆亂龐雜之禮若曰一詩而兩用如所謂冬薦魚春獻鮪者則此詩專言天而不及地若於澤中方丘奏之則於義何所取乎序說

荆川雜編 卷之八
之云反覆推之皆有不通其謬無可疑者故今特上
據國語旁采歐陽以定其說庶幾有以不失此詩之
本旨耳或曰國語所謂始於德讓中於信寬終於固
蘇故曰成者其語成字不爲王誦之謚而韋昭之注
大畧亦如毛鄭之說矣此又何耶曰叔向蓋言成王
之所以爲成以是三者正猶子思所謂文王之所以
爲文班固所謂尊號曰昭不亦宜乎者耳韋昭何以
知其必謂文武以是成其王道而不爲王誦之謚乎
蓋其爲說本出毛鄭而不悟其非者今欲一滌千古
之謬而不免乎以誤而證誤則亦將何時而已耶或

者又曰蘇氏最爲不信小序而於此詩無異詞且又
以爲周公制作所定後王不容復有改易成王非創
業之主不應得以基命稱之此又何耶曰蘇氏之不
信小序固未嘗見其不可信之實也夫周公制作亦
及其當時之事而止耳若乃後王之廟所奏之樂自
當隨時附益若商之玄鳥作於武丁孫子之世漢之
廟樂亦隨時而更定焉豈有周公之後王乃獨不得
褒顯其先王之功德而必以改周公爲嫌耶基者非
必造之於始亦承之於下之謂也如曰邦家之基豈
必謂太王王季之臣乎以是爲說亦不得而通矣况

蘇氏所以爲此實未能忘北郊集議之餘念今固不得而取也

燕魯齊詩傳畧

燕韓嬰作內外傳數萬言頗與齊魯間殊然歸一也漢藝文志韓故三十六卷內傳四卷外傳六卷說四十一卷隋經籍志韓詩二十二卷薛氏章句韓詩翼要十卷漢侯苞撰梁有韓詩譜一卷唐藝文志韓詩卜商序韓嬰注二十二卷又外傳十卷

關雎 詩人言雎鳩貞潔慎匹以聲相求隱蔽乎無人之處故人君退朝入于私宮后妃御見去留

度應門擊柝鼓人上堂退反宴處體安志明今時

大人內傾于色賢人見其萌故詠關雎說淑女正

容儀以刺時薛君章句 後漢書明帝詔應門失守閔雎刺世宋均曰應門聽政之處

也言不以政事為務有宣淫之心關雎樂而不淫思得賢人與之共化修應門之政者也 又馮衍傳注薛夫子章句 曰雎鳩貞潔云云

窈窕貞專貌淑女奉順坤德成其綱紀

卷耳 頃筐歌筐也金罍大夫器也天子以玉諸侯

大夫皆以金士以梓一升曰爵爵盡也足也二升

曰觶觶寡也飲當寡少三升曰解解適也飲當自

適也四升曰角角觸也不能自適觸罪過也五升

曰散散訕也飲不自節為人所謗訕也總名曰爵
其實曰觴觴者餉也觥亦五升所以罰不敬觥廓
也所以著明之貌君子有過廓然著明非所以餉
不得觴韓詩說正義
又儀禮疏

芣苢 傷夫有惡疾也直曰車前瞿曰芣苢芣苢木
名實似李芣苢澤瀉也芣苢臭惡之菜詩人傷其
君子有惡疾人道不通不得發憤而作以興
芣苢雖為惡菜我猶采采而不已以興君子雖有
惡疾我猶守而不離去

騶虞 天子掌鳥獸官

柏舟 衛宣姜自警所作

燕燕 衛定姜歸其姊送之而作

蝮蝮 刺淫奔女也詩人言蝮蝮在東者邪色乘陽

人君淫佚之徵臣子為君父隱藏故言莫之敢指
乃如之人兮

黍離 伯封作也離離黍貌也詩人求亡不得

不識於物視彼黍離離然憂甚之時反以為
稷之苗乃自知憂之甚也昔尹吉甫信後妻

而殺孝子伯奇其弟伯封求而不得作黍離之詩
荷嗟 舞則繁兮言其舞則應雅樂也薛君章句
文選注

四矢變兮變易也 釋文

伐檀 順流而風曰淪何謂素餐兮素者質也人但有質朴而無治民之材名曰素餐尸祿者頗有所知善惡不言默然不語苟欲得祿而已譬如尸焉

薛君章句

歲聿其莫聿辭也莫晚也言君之年歲已晚

薛君章句

匪車揭兮中心慙兮說曰是非古之風也發者是非古之車也揭揭者蓋傷之也 漢書王吉傳古學韓

鷓鴣 鷓鴣鳥名也鷓鴣所以愛養子者適以病之

愛憐養其子者謂堅固其窠巢病之者謂不知托于大樹茂枝反敷之葦蒿風至蒿折巢覆有子則死有郊則破是其病也 文選注

湛露 悒悒夜飲 說文悒悒和悅之貌夫飲之禮不

脫屣而即序者謂之禮疏而上坐者謂之宴能飲者飲之不能飲者已謂之醜齊顏色均衆寡謂之沉閉門不出者謂之酒故君子可以宴可以醜不可以沉不可以酒

鼓鍾 昭王之時作 正義鄭于中侯握何紀注云昭王之時鼓鍾之詩所為作者依

刊一甲編

三為說也南夷之樂曰南四夷之樂唯南可以于雅

者以其人聲音及籥不僭差也後漢書注薛君云王者舞

六伐之樂四夷之樂大德廣被之所及內傳文選注

生民 三王各正其郊轉說說禮記正義姜姓原字韓詩章句史記

注聖人皆無父感天而生異義韓魯惟辭也

抑 侯包云衛武公刺王室亦以自戒

天作 彼徂者岐有夷之行徂往也夷易也行道也

彼百姓歸文王者皆曰岐周有易道可往歸矣易

道謂仁義之道而易行故岐道阻險而人不難

振鷺 西雍文王之雍也言文王之時辟雍學士皆

潔白之人也薛君章句後漢書注

商頌 美襄公史記宋世家襄公之時修仁行義欲與盟會其大夫正考甫美之追道契

湯高宗殷所以興作商頌注韓詩章句美襄公

魯申培始為詩傳號魯詩漢志魯故二十五卷說二

十八卷隋志魯詩亡於西晉而小學有一字石經魯

詩六卷

佩玉晏鳴關雎嘆之漢書杜欽傳李奇曰后夫人雞鳴佩玉去君所周康王后不

然故詩人嘆而傷之臣瓚曰此魯詩也

先君之思以畜寡人此衛大夫定姜之詩也定姜無

子立庶子衍是為獻公畜孝也獻公無禮於定姜

定姜作詩言獻公當思先君定公以孝于寡人

齊轅固為傳漢志齊后氏故二十卷傳三十九卷孫

氏故二十七卷傳二十八卷雜記十八卷隋志齊詩

魏代已亡

魏宣公之子壽閔其兄伋之且見害作憂思之詩黍

離之詩是也洪邁容齋四筆齊詩以為云云按晁氏詩序論齊魯韓三家以正風為魯詩

騶虞為天子掌鳥獸官齊詩章句

五際

考索

翼奉初學齊詩聞五際之要十月之交篇知日食地

震之效昭然可明猶巢居知風穴居知雨○鄭作六

藝論引汎歷樞云午亥之際為革命卯酉為改正辰

在天門出入候聽卯天保也酉祈父也午采芑也亥

大明也亥為革命一際也辰為天門出入候聽二際

也卯為陰陽交際三際也午為陽謝陰興四際也酉

為陰盛陽微五際也其詩含此五際其內傳曰五際

卯酉午戌亥也陰陽終始際會之歲於此則有變改

之政也詩有五際推得失考天心以言王道之安危

四家詩

鄭樵

齊魯燕趙四詩土音不同訓詁亦異故孔穎達曰三

家之詩字與毛公異者動以百數及證之他書三家

之學非徒字異亦併與文義俱異矣當武帝時毛詩始出自以源流出於子夏其書貫穿先秦古書惟河間獻王好古博見異書深知其精時齊魯韓三家皆列於學官獨毛氏不得立中興後謝曼卿衛宏賈逵馬融鄭眾康成之徒皆宗毛公學者翕然稱之今觀其書所釋鴟鴞與金縢合釋北山烝民與孟子合釋昊天有成命與國語合釋碩人清人皇矣黃鳥與左氏合而序由庚六篇與儀禮合當毛公之時左氏傳未出孟子國語儀禮未甚行而毛氏之說先與之合不謂之源流子夏可乎漢興三家盛行毛最後出世

人未知毛氏之密其說多從齊魯韓氏迨至魏晉有左氏國語孟子諸書證之然後學者捨三家而從毛氏故齊詩亡於魏魯詩亡於晉韓詩雖傳無存之者五十篇今但存其外傳十篇而已從韓氏之說則二南商頌皆非治世音以二南作於周衰以次商頌作於宋襄公之世從毛氏之說則禮記左氏無往而不合此所以毛詩獨存于世也

詩譜序

歐陽脩後同

兩朝國史志歐陽脩於絳州得注本卷首殘闕因補成進之而不知注者爲太叔求也

荆川和詩 卷之六
毛鄭於詩其學亦已博矣予嘗依其箋傳考之於經而證以序譜惜其不合者頗多蓋詩述商周自生民玄鳥上陳稷契下迄陳靈公千五六百歲之間旁及列國君臣世次國地山川封域圖牒鳥獸草木魚蟲之名與其風俗善惡方言訓詁盛衰治亂美刺之由無所不載然則孰能無失於其間哉予疑毛鄭之失既多然不敢輕爲改易者意其爲說不止於箋傳而已恨不得盡見二家之書未能徧通其旨夫不盡見其書而欲折其是非猶不盡人之辭而欲斷其訟之曲直其能果於自決乎其能使之必服乎世傳鄭氏

詩譜最詳求之久矣不可得雖崇文總目秘書所藏亦無之慶曆四年奉使河東至於絳州偶得焉其文有注而不見名氏然首尾殘闕自周公致太平已上皆亡之其國譜旁行尤易爲訛舛悉皆顛倒錯亂不可復考凡詩雅頌兼列商魯其正變之風十有四國而其次皆莫詳其義惟封國變風之先後不可以不知周召王幽同出於周邶鄘弁於衛檜魏無世家其可考者陳齊衛晉曹鄭秦此封國之先後也幽齊衛檜陳唐秦鄭魏曹此變風之先後也周南召南邶鄘衛王鄭齊幽秦魏唐陳曹此孔子未刪詩之前周太

荆川雜錄 卷之八
師樂歌之次第也周召邶鄘衛王檜鄭齊魏唐秦陳
曹豳此鄭氏詩譜次第也黜檜後陳此今詩次第也
初予未見鄭譜嘗略考春秋史記本紀世家年表而
合以毛鄭之說爲詩圖十四篇今因取以補鄭譜之
亡者足以見二家所說世次先後甚備因據而求其
得失較然矣而仍存其圖庶幾以見予于鄭氏之學
盡心焉耳夫盡其說而有所不通然後得以論正予
豈好爲異論者哉凡補其譜十有五補其文字二百
七增損塗乙改正者三百八十三而鄭氏之譜復完

王國風解

六經之法所以法不法正不正由不法與不正然後
聖人者出而六經之書作焉周之衰也始之以夷懿
終之以平桓平桓而後不復支矣故書止文侯之命
而不復錄春秋起周平之年而治其事詩自黍離之
什而降於風絕於文侯之命謂教令不足行也起于
周平之年謂正朔不足加也降於黍離之什謂雅頌
不足興也教令不行天下無王矣正朔不加禮樂偏
出矣雅頌不興王者之迹息矣詩書貶其失春秋憫
其微無異焉爾然則詩處於衛後而不次於二南惡
其近于正而不明也其體不加周姓而存王號嫌其

混於諸侯而無王也近正則貶之不著矣無王則絕
之大遽矣不著云者周召二南至正之詩也次於至
正之詩是不得貶其微弱而無異二南之詩爾若然
豈降之乎太遽云者春秋之法書王以加正月言王
人雖微必尊於上周室雖弱不絕其王苟絕而不與
其尊周乎故曰王號之存黜諸侯也次衛之下別正
變也桓王而後雖欲其正風不可得也詩不降于厲幽
之年亦猶春秋之作不在惠公之世爾春秋之作傷
典誥之絕也黍離之降閔雅頌之不復也幽平而後
有如宣王者出則禮樂征伐不在諸侯而雅頌可知

奈何推波助瀾縱風止燎乎

幽問

或問七月幽風也而鄭氏分爲雅頌其詩八章以其
一章二章爲風三章四章五章六章之半爲雅又以
六章之半七章八章爲頌一篇之詩別爲三體而一
章之言半爲雅而半爲頌詩人之意果若是乎應之
曰七月周公之作也其言幽土寒暑氣節農桑之候
勤生事男女耕織衣食之本以見太王居幽興起王
業艱難之事此詩之本義毛鄭得之矣其爲風爲雅
爲頌吾所不知也所謂七月之本義幸在者吾旣得

之矣其有所難知者闕之可也雖然吾知鄭氏之說
自相牴牾者矣今詩之經毛鄭所學之經也經以為
風而鄭氏以為雅頌豈不戾哉夫一國之事謂之風
天下之政謂之雅以其成功告於神明謂之頌此毛
鄭之說也然則風諸侯之事雅天子之事今所謂七
月者謂之風可矣謂之雅頌則非天子之事又非告
功於神明者此又其戾者也風雅頌之為名未必然
則於其所自為說有不能通也問者又曰鄭氏所以
分為雅頌者豈非以周禮籥章之職有吹豳詩雅頌
之說乎應之曰今之所謂周禮者不完之書也其禮

樂制度蓋有周之大法焉至其考之於事則繁雜而
難行者多故自漢興六經復出而周禮獨不為諸儒
所取至以為黷亂不驗之書獨鄭氏尤推尊之宜其
分豳之風為雅頌以合其事也問者又曰今豳詩七
篇自鴟鴞以下六篇皆非豳事獨七月一篇豈足以
自為一國之風然則七月而下七篇寓于豳風耳豳
其自有詩乎周禮所謂豳雅豳頌者豈不為七月而
自有豳詩而今亡者乎至于七月亦嘗亡矣故齊魯
韓三家之詩皆無之由是言之豳詩其猶有亡者乎
應之曰經有其文猶有不可知者經無其事吾可逆

荆川釋經 卷之六
意而爲然乎

十五國次解

國風之號起周終函皆有所次聖人豈徒云哉而明詩者多泥於數說而不通或者又以爲聖人之意不在於先後之次是皆不足爲訓法者大抵國風之次以兩而合之分其次以爲比則賢善者著而醜惡者明矣或曰何如其謂之比乎曰周召以淺深比也衛王以世爵比也鄭齊以族氏比也魏唐以土地比也秦陳以祖裔比也檜曹以美惡比也函能終之以正故居末焉淺深云者周得之深故先於召世爵云者

衛爲紂都而紂不能有之周幽東遷無異是也加衛於先明幽紂之惡同而不得近于正焉姓族云者周法尊其同姓而異姓者爲後鄭先於齊其理然也土地云者魏本舜地唐爲堯封以舜先堯明晉之亂非魏褊儉之等也祖裔云者陳不能興舜而襄公能大於秦子孫之功陳不如矣穆姜卜而遇艮之隨乃引文言之辭以爲卦說夫穆姜始筮時去孔子之生尚十四年爾是文言先於孔子而有乎不然左氏不爲譏妄也推此以迹其怪則季札觀樂之次明白可驗而不足爲疑矣夫黍離已下皆平王東遷桓王失位

之詩是以列于國風言其不足正也借使周天子至甚無道則周之樂工敢以周王之詩降同諸侯乎是皆不近人情不可為法者昔孔子大聖人其作春秋也既微其辭然猶不公傳於人弟子口授而已况一樂工而敢明白彰顯其君之惡哉此又可驗孔子分定為信也本其事而推之以著其妄庶不為無據云

定風雅頌解

詩之息久矣天子諸侯莫得而自正也古詩之作有天下焉有一國焉有神明焉觀天下而成者人不得而私也體一國而成者衆不得而違也會神明而成

者物不得而欺也不私焉雅著矣不違焉風一矣不欺焉頌明矣然則風生於文王而雅頌雜于武王之間風之變自夷懿始雅之變自厲幽始霸者興變風息焉王道廢詩不作焉秦漢而後何其滅然也王通謂諸侯不貢詩天子不採風樂官不達雅頌國史不明變非民之不作也詩出於民之情性情性其能無哉職詩者之罪也通之言其幾於聖人之心矣或問成王周公之際風有變乎曰豳是矣幸而成王悟也不然則變而不能復乎豳之去雅一息焉蓋周公之心也故能終之以正

魯頌解

或問諸侯無正風而魯有頌何也曰非頌也不得已而名之也四篇之體不免變風之例爾何頌乎頌惟一章而魯頌章句不等頌無頌字之號而今四篇皆有其序曰季孫行父請命于周而史克作之亦未離乎疆也頌之本一人是之未可作焉訪于衆人衆人可之猶曰天下有非之者又訪于天下天下人亦曰可然後作之無疑矣僖公之政國人猶未全其惠而春秋之貶尚不能逃未知其頌何從而興乎頌之美者不過文武文武之頌非當其存而作者也皆追述

也僖公之德孰與文武而曰有頌乎先儒謂名生於不足宜矣然聖人所以列爲頌者其說有二貶魯之疆一也勸諸侯之不及二也請于天子其非疆乎特取於魯其非勸乎或曰何謂勸曰僖公之善不過復土宇修宮室大牧養之法爾聖人猶不敢遺之使當時諸侯有過於僖公之善者聖人忍絕去而不存之乎故曰勸爾而鄭氏謂之備三頌何哉大抵不列於風而與其爲頌者所謂憫周之失貶魯之強是矣豈鄭氏之云乎

魯問

或問魯詩之頌僖公盛矣信乎其克淮夷伐戎狄服
荆舒荒徐宅至于海邦蠻貊莫不從命何其盛也泮
水曰既作泮宮淮夷攸服矯矯武臣在泮獻馘又曰
既克淮夷孔淑不逆又曰景波淮夷來獻其琛闕宮
曰戎狄是膺荆舒是懲又曰淮夷來同魯侯之功又
曰遂荒徐宅至于海邦淮夷蠻貊及彼南夷莫不率
從其武功之盛威德所加如詩所陳五霸不及也然
魯在春秋時常為弱國其與諸侯會盟征伐見于春
秋史記者可數也皆無詩文所頌之事而淮夷戎狄
荆舒徐人之事有見於春秋者又皆與頌不合者何

也按春秋僖公在位三十三年其伐邾者四敗莒滅
項者各一此魯自用兵也其四年伐楚侵陳六年伐
鄭是時齊桓公方稱霸主兵率諸侯之師而魯亦與
焉耳二十八年圍許是文公方稱伯主兵率諸侯而
魯亦與焉耳十五年楚伐徐魯救徐而徐敗十八年
宋伐齊魯救齊而齊敗二十六年齊人侵伐魯鄙魯
乞師于楚楚為伐齊取穀春秋所記僖公之兵止于
是矣其自主兵所伐邾莒項皆小國雖能滅項反見
執于齊其所伐大國皆齊晉主兵其有所救者又力
不能勝而輒敗由是言之魯非強國可知也焉有詩

人所頌威武之功乎其所侵伐小國春秋必書焉有所謂克服淮夷之事乎惟其十六年一會齊侯于淮爾是會也淮夷侵鄆齊侯來會謀救鄆爾由是言之淮夷未嘗服于魯也其曰戎狄是膺荆舒是懲者鄭氏以謂僖公與齊桓舉義兵北當戎與狄南艾荆及群舒按僖公即位之元年齊桓二十七年也齊桓十七年伐山戎遠在僖公未即位之前至僖公十年齊侯許男伐戎魯又不與鄭氏之說既謬而詩所謂戎狄是膺者孟子又曰周公方且膺之如孟子之說豈僖公事也荆楚也僖公之元年楚成王之十三年也

是時楚方強盛非魯所能制僖之四年從齊桓伐楚而齊以楚強不敢速進乃次于陘而楚遂與齊盟于召陵此豈魯僖得以爲功哉六年楚伐許又從齊桓救許而力不能勝許男卒固縛衡璧降于楚十五年楚伐徐又從齊桓救徐而力又不能勝楚卒敗徐取其婁林之邑舒在僖公之世未嘗與魯通惟三年徐人取舒一見爾蓋舒爲徐取之矣然則鄭氏謂僖公與齊桓南艾荆及群舒者亦謬矣由是言之所謂戎狄是膺荆舒是懲者皆與春秋不合矣楚之伐徐取其婁林齊人徐人伐英氏以報之蓋徐人之有楚伐也

不求助於魯而求助於齊以報之以此見徐非魯之與國也則所謂遂荒徐宅者亦不見於春秋矣詩孔子所刪正也春秋孔子所修也修詩之言不妄則春秋踈謬矣春秋可信則詩妄作也其將柰何應之曰吾固言之矣雖其本有所不能達者猶將闕之是也惟闕其不知以俟焉可也

商頌解

古詩三百篇始終於周而仲尼兼以商頌豈多記而廣錄者哉聖人之意存一頌而有三益大商祖之德其益一也予紂之不憾其益二也明武王周公之心

其益三也曷謂大商祖之德曰頌具矣曷謂予紂之不憾曰憫廢矣曷謂明武王周公之心曰存商矣按周本紀稱武王伐紂下車而封武庚于宋以為商後及武庚叛周公又以微子繼之是聖人之意雖惡紂之暴而不忘湯之德故始終不絕其為後焉或曰商頌之存豈異是乎曰其然也而人莫之知矣非仲尼武王周公之心殆而成湯之德微毒紂之惡有不得其著矣向所謂存一頌而有三益焉者豈妄云哉

序問

或問詩之序卜商作乎衛宓作乎非二人之作則作

者其誰乎應之曰書春秋皆有序而著其名氏故可知其作者詩之序不著其名氏安得而知之乎雖然非子夏之作則可以知也曰何以知之應之曰子夏親受學於孔子宜其得詩之大旨其言風雅有變正而論關雎鵲巢繫之周公召公使子夏而序詩不為此言也自聖人歿六經多失其傳一經之學分爲數家不勝其異說也當漢之初詩之說分爲齊魯韓三家晚而毛氏之詩始出久之三家之學既廢而毛詩獨行以至于今不絕今齊魯之學沒不復見而韓詩遺說往往見于他書至其經文亦不同如逶迤郁夷

之類是也然不見其終始亦莫知其是非自漢以來學者多矣其卒捨三家而從毛公者蓋以其源流所自得聖人之旨多歟今考毛詩諸序與孟子說詩多合故吾於詩常以序爲證也至其時有小失隨而正之惟周南召南失者類多吾固已論之矣學者可以察焉

時世論

二南小雅皆作于周衰頌作于康王以後

按鄭氏譜周南召南言文王受命作邑於豐乃分岐邦周邦周召之邑爲周公旦召公奭之采地使施先公太王王季之教於已所職六州之國其民被二公

之德教尤純至武王滅紂巡守天下陳其詩以屬太師分而國之其得聖人之化者繫之周公謂之周南其得賢人之化者繫之召公謂之召南今考之於詩義皆不合而其爲說者又自相牴牾所謂被二公之德教者是周公且召公奭所施太王王季之德教爾今周召之詩二十五篇關雎葛覃卷耳樛木螽斯桃夭兔置采芣苢皆后妃之事鵲巢采芣小星皆夫人之事夫人乃太姒也麟趾騶虞皆后妃夫人之德化之應草蟲采蘋殷其雷皆大夫妻之事漢廣汝墳羔羊標有梅江有汜野有死麕皆言文王之化蓋此二十

二篇之詩皆述文王太姒之事其餘二篇其棠行露言召伯聽訟何彼穠矣乃武王時之詩烏有所謂二公所施先公之德教哉此以譜考詩義皆不能合者也譜言得聖人之化者謂周公也得賢人之化者謂召公也謂旦奭共行先公之德教而其所施自有優劣故以聖賢別之爾今詩所述既非先公之德教而二南皆是文王太姒之事無所優劣不可分其聖賢所謂文王太姒之事其德教自家刑國皆其夫婦身自行之以化其下久而變紂之惡俗成周之王道而著於歌頌爾蓋譜謂先公之德教者周召二公未嘗

井川和經 卷之八
有所施而二南所載文王太姒之化二公亦又不得而與然則鄭譜之說左右皆不能合也後之爲鄭學者又謂譜言聖人之化者爲文王賢人之化者爲太王王季然譜本謂二公行先公之教初不及文王則爲鄭學者又自相牴牾矣今詩之序曰關雎麟趾之化王者之風故繫之周公鵲巢騶虞之德諸侯之風故繫之召公至于關雎鵲巢所述一太姒爾何以爲后妃何以爲夫人二南之事一文王爾何以爲王者何以爲諸侯則序皆不通也又不言作詩之時世蓋自孔子歿羣弟子散亡而六經多失其旨詩以諷誦

相傳五方異俗物名字訓往往不同故於六經之失詩尤甚詩三百餘篇所作非一人所作非一國先後非一時而世久失其傳故於詩之失時世尤甚周之德盛于文武其詩爲風爲雅爲頌風有周南召南雅有大雅小雅其義類非一或當時所作或後世所述故於時世之失周詩尤甚自秦漢以來學者之說不同多矣不獨鄭氏之說也昔孔子嘗言關雎矣曰哀而不傷太史公又曰周道缺詩人本之衽席關雎作而齊魯韓三家皆以爲康王政衰之詩皆與鄭氏之說其意不類蓋常以哀傷爲言由是言之謂關雎爲

周衰之作者近是矣周之爲周也遠自上世積德累仁至于文王之盛征伐諸侯之不服者天下歸者三分有二其仁德所及下至昆蟲草木如靈臺行葦之所述蓋其功業盛大積累之勤其來遠矣其盛德被天下者非一事也太妣賢妃又有內助之功爾而言詩者過爲稱述遂以關雎爲王化之本以謂文王之興自太妣始故於衆篇所述德化之盛皆云后妃之化所致至于天下太平麟趾與騶虞之瑞亦以爲后妃功化之盛效故曰麟趾關雎之應騶虞鵲巢之應也何其過論歟夫王者之興豈專由女德惟其後世

因婦人以致衰亂則宜思其初有婦德之助以興爾因其所以衰思其所以興此關雎之所以作也其思彼之辭甚美則哀此之意亦深其言緩其意遠孔子曰哀而不傷謂此也司馬遷之於學也雜博而無所擇然其去周秦未遠其爲說必有老師宿儒之所傳其曰周道缺而關雎作不知自何而得此言也吾有取焉昔吳季札聞魯人之歌小雅也曰思而不二怒而不言其周德之衰乎猶有先王之遺民焉而太史公亦曰仁義陵遲鹿鳴刺焉然則小雅者亦周衰之作也周頌昊天有成命曰二后受之成王不敢康所

謂二后者文武也則成王者成王也猶文王之爲文
王武王之爲武王也然則昊天有成命當是康王已
後之詩而毛鄭之說以頌皆是成王時作遂以成王
爲成此王功不敢康寧執競曰執競武王無競維烈
不顯成康上帝是皇自彼成康奄有四方所謂成康
者成王康王也猶文王武王謂之文武爾然則執競
者當是昭王已後之詩而毛以爲成大功而安之鄭
以爲成安祖考之道皆以爲武王也據詩之文但云
成康爾而毛鄭自出其意各以增就其已說而意又
不同使後世何所適從哉噫嘻曰噫嘻成王者亦成

王也而毛鄭亦皆以爲武王由信其已說以頌皆成
王時作也詩所謂成王者成王也成康者成王康王
也豈不簡且直哉而毛鄭之說豈不迂而曲也以爲
成王康王則於詩文理易通如毛鄭之說則文義不
完而難通然學者捨簡而從迂捨直而從曲捨易通
而從難通或信焉而不知其非或疑焉而不敢辯者
以去詩時世遠茫昧而難明也余於周南召南辯其
不合而關雎之作取其近似者焉蓋其說合於孔子
之言也若雅也頌也則辯之而不敢必而有待焉夫
毛鄭之失患于自信其學而曲遂其說也若予又將

自信則是笑奔車之覆而疾驅以追之也然見其失不可不辯辯而不敢必使余之說得與毛鄭之說並立於世以待夫明者而擇焉可也

本末論

關雎鵲巢文王之詩也不繫之文王而下繫之周公召公召公自有詩則得列於本國周公亦自有詩則不得列于本國而上繫於幽幽太王之國也考其詩則周公之詩也周召周公召公之國也考其詩則文王之詩也何彼穠矣武王之詩也不列于雅而寓於召南之風棠棣周公之詩也不列于周南而寓于文

王之雅衛之詩一公之詩也或繫之邶或繫之鄘或繫之衛詩述在位之君而風繫已亡之國晉之爲晉久矣不得爲晉而謂之唐鄭去咸林而徙河南爲鄭甚新而遂得爲鄭自漢以來其說多矣蓋詩之類例不一如此宜其說者之紛然也問者曰然則其將柰何應之曰吾之于詩有幸有不幸也不幸者遠出聖人之後不得質吾疑也幸者詩之本義在爾詩之作也觸事感物文之以言美者美之惡者刺之以發其揄揚怨憤於口道其哀樂喜怒於心此詩人之意也古者國有采詩之官得而錄之以屬大師播之於樂

於是考其義類而別之以爲風雅而比次之以藏于
有司而用之宗廟朝廷下至鄉人聚會此太師之職
也世久而失其傳亂其雅頌亡其次序又采者積多
而無所擇孔子生于周末方修禮樂之壞于是正其
雅頌刪其繁重列于六經著其善惡以爲勸戒此聖
人之志也周道既衰學校廢而異端起及漢承秦焚
書之後諸儒講說者整齊殘缺以爲之義訓耻于不
知而人人各自爲說至或遷就其事以曲成其已學
其于聖人有得有失此經師之業也惟是詩人之意
也太師之職也聖人之志也經師之業也今之學詩

也不出于此四者而罕有得焉者何哉勞其心而不
知其要逐其末而忘其本也何謂本末作此詩述此
事善則美惡則刺所謂詩人之意者本也正其名別
其類或繫于此或繫於彼所謂太師之職者末也察
其美刺知其善惡以爲勸戒所謂聖人之志者本也
求詩人之意達聖人之志者經師之本也講太師之
職因其失傳而妄自爲之說者經師之末也今夫學
者得其本而通其末斯盡善矣得其本而不通其末
闕其所疑可也雖其本有所不能達者猶將闕之况
其末乎所謂周召邶鄘唐幽之風是可疑也考之諸

儒之說既不能通欲從聖人而質焉又不可得然皆其末也若詩之所載事之善惡言之美刺所謂詩人之意幸其具在也然頗爲衆說汨之使其義不明今去其汨亂之說則本義粲然而出矣今夫學者知前事之善惡知詩人之美刺知聖人之勸戒是謂知學之本而得其要其學足矣又何求焉其末之可疑者闕其不知可也蓋詩人之作詩也固不謀于太師矣今夫學詩者求詩人之意而已太師之職有所不知何害乎學詩也若聖人之勸戒者詩人之美刺是也知詩人之意則得聖人之志也

十月之交解

小雅無厲王之詩著其惡之甚也而鄭氏自十月之交已下分其篇以爲當刺厲王又妄指毛公爲詁訓時移其篇目因引前後以爲據其說有三一曰節刺師尹不平此不當譏皇父擅恣予謂非大亂之世者必下容二人之專不然李斯趙高不同生于秦也其二曰正月惡褒姒滅周此不當疾豔妻之說出于鄭氏非史傳所聞况褒姒之惡天下萬世皆同疾而共醜者二篇譏之殆豈過哉其三曰幽王時司徒乃鄭桓公友此不當云番維司徒予謂史記所載鄭桓公

在幽王十八年方爲司徒爾豈止桓公哉是三說皆不合於經不可按法爲鄭氏者獨不能自信而欲指他人之非斯亦惑矣今考兩無正已下三篇之詩又其亂說歸向皆無刺厲王之文不知鄭氏之說何從而爲據孟子曰說詩者不以文害辭不以辭害意非如是其能通詩乎

詩解統序

五經之書世人號爲難通者易與春秋夫豈然乎經皆聖人之言固無難易繫人之所得有淺深今考於詩其難亦不讓二經然世人反不難而易之用是通

者亦罕使其存心一則人人皆能明而經無不通矣大抵謂詩爲不足通者有三曰章句之詩也曰淫褻之辭也曰猥細之記也若然孔子爲泛儒矣非唯今人易而不習考乎先儒亦無幾人是果不足通歟唐韓文公最爲知道之篤者然亦不過議其序之是否豈足明聖人本意乎易書禮樂春秋道所存也詩關此五者而明聖人之用焉迹其道不知其用之與奪猶不辨其物之曲直而欲制其方圓是果於其成乎故二南牽于聖賢國風惑於先後幽居變風之末惑者溺於私見而謂之兼上下二雅混于小大而不明

三頌昧於商魯而無辯此一經大槩之體皆所未正者先儒既無所取捨後人因不得其詳由是難易之說興焉毛鄭二學其說熾辭辯固已廣博然不合于經者亦不爲少或失於踈略或失於謬妄蓋詩載關雎上兼商世下及武成平桓之間君臣得失風俗善惡之事廣濶遼邈有不失者鮮矣是亦可疑也予欲志鄭學之妄益毛氏之踈略而不至者合之於經故先明其統要十篇庶不爲之蕪泥云爾

二南爲正風

天子諸侯當大治之世不得有風風之生天下無王

矣故曰諸侯無正風然則周召可爲正乎曰可與不可非聖人不能斷其疑當文王與紂之時可疑也可疑之際天下雖惡紂而主文王然文王不得全有天下爾亦曰服事於紂焉則二南之詩作於事紂之時號令征伐不止於受命之後爾豈所謂周室衰而關雎始作乎史氏之失也推而別之二十五篇之詩在商不得爲正在周不得爲變焉上無明天子號令由已出其可謂之正乎二南起王業文王正天下其可謂之變乎此不得不疑而輕其與奪也學詩者多推於周而不辯于商故正變不分焉以治亂本之二南

之詩在商爲變而在周爲正乎或曰未諭曰推治亂而迹之當不誣矣

周召分聖賢解

聖人之治無異也一也統天下而言之有異焉者非聖人之治然矣由其民之所得有淺深焉文王之化出乎其心施乎其民豈異乎然孔子以周召爲別者蓋上下不得兼而民之所化有淺深爾文王之心則一也無異也而說者以爲由周召聖賢之異而分之何哉大抵周南之民得之者深故因周公之治而繫之豈謂周公能行聖人之化乎召南之民得之者淺

故因召公之治而繫之豈謂召公能行賢人之化乎殆不然矣或曰不繫於雅頌何也曰謂其本諸侯之詩也又曰不統於變風何也曰謂其周迹之始也列於雅頌則終始之道混矣雜於變風則文王之跡殆矣雅頌焉不可混周迹之始其將略而不具乎

論歐詩解

通考

晁氏曰歐公解詩毛鄭之說已善者固爲之不改至於質諸先聖則悖理考於人情則不可行然後易之故所得比諸儒最多但平日不信符命嘗著書以周易河圖洛書爲妖妄今又以生民玄鳥之詩爲怪說

蘇子瞻曰帝王之與其受命之符卓然見於詩書者多矣河圖洛書玄鳥生民之詩豈可謂誣也哉恨學者推之太詳流入讖緯而後之君子亦矯枉過正舉從而廢之以爲王莽公孫述之流緣此作亂使漢不失德莽述何自起而歸罪三代受命之符亦過矣

二南辯

鄭樵

輿論後同

二南六州漢志扶風縣東北有周城西南有召城二南之詩得於周南係之周南得於召南係之召南本於所得之地而係之耳蓋歌則從二南之聲二南皆出於文王之化言王者之化自北而南東北一區尚染紂惡惟西

南皆從文王之化

周召二公未嘗與其間二南之詩後世取

以爲樂章用之爲燕樂爲鄉樂爲射樂爲房中之樂所以彰文王之德美也故曰大武始于北出再成而滅商三成而南南之爲義蓋如是也五成而分周公左召公右周召南之爲義蓋如是也周世未有樂名南者維鍾鼓之詩曰以雅以南陸希聲劉炫釋鍾鼓南微出已意曰南如周南之南以籥不僭左氏載季札觀樂爲有象舞籥南舞籥者杜預釋左氏亦知南籥爲文王之樂不敢正指爲南籥者詳而考之南籥二南之籥也雅也象舞頌之維清也籥之舞象籥之奏南其在當時見古樂如此而文王世子又

有所謂胥鼓南鄭注謂南夷之樂豈有教世子而用夷樂則南之爲樂古矣二南之詩雖大槩美詩亦有刺詩不徒西周之時而東周亦然與十三國風無異也若以爲周衰之詩此齊魯韓之學也而周之盛時無一篇可取所謂盡周衰之文耳此三家之學不如毛氏之密也

關雎辯

齊魯韓三家皆以關雎爲康王政衰之詩楊雄曰周康之時關雎作于上楊賜曰康王宴起關雎見幾而作太史公曰周道缺詩人本之衽席而關雎作范曄有曰康后晚朝關雎作諷薛君章句亦謂關雎詠淑

女以刺時詳諸上文皆謂作於周衰之文而不知麟趾乃關雎之應也序亦言衰世之公子季札觀歌小雅曰其周德之衰乎太史公曰仁義凌遲鹿鳴刺焉如此則麟趾小雅鹿鳴諸詩皆非治世音無疑矣曰非也蓋詩者樂也古人以聲詩奏之樂後世有不能法祖怠於政者則取是詩而奏之以申警諷故曰作之爲義如始作翕如之作非謂其詩始作於衰世也孔子言詩皆取詩之聲不會說詩之義如何如曰關雎樂而不淫哀而不傷天子喜魯太師之樂音節淫哀矣而不及於傷皆從樂奏中又曰師摯之始關言之非以序別其關雎之文義

非川和編 卷之六
睢之亂皆樂之聲也非謂關雎之義如此序詩者取
以爲關雎之義則非矣太抵古人學詩最要理會詩
之聲夫子曰人而不爲周南召南其猶正牆面而立
爲之爲義亦作之意旣爲之作則翕純嘏繹有聲有
器非但歌詠而爲周南召南之爲正如三年不爲樂
不圖爲樂之至於斯之爲謂之爲謂之作者皆樂之
聲也

國風辯

詩者聲詩也出於情性古者三百篇之詩皆可歌歌
則各從其國之聲周召王豳之詩同出於周而分爲

四國之聲邶鄘衛之詩同出於衛而分爲三國之聲
蓋採詩之時得之周南者繫之周南得之召南者繫
之召南得之王城與豳者繫之王城與豳得之邶鄘
衛者繫之邶鄘衛蓋歌則各從其國之聲何彼穠矣
之詩何以不列於王風蓋爲詩之時則東周也採詩
之地則召南也故列之召南黍離之詩何以不列之
於二南蓋周大夫行役至於宗周之地閱其壞而思
其舊其詩雖作於西周其人則東周也故列之王風
平王何以不曰雅以其地則東周也幽厲何以不曰
風以其地則成周也如此則木瓜雖美齊而在衛猗

嗟雖刺魯而在齊泉水載馳等詩皆衛詩而在邶鄘
召穆之民勞衛武之賓之初筵不附其國而在二雅
皆以聲別也夫風之詩出於土風而雅之詩則出於
朝廷大夫爾文王之詩見於風者二南是也成王之
詩見於風者豳風是也平王之詩見於風者王風是
也雅頌之音與天下同列國之音隨風土而異若謂
降黍離而爲國風則豳詩亦可降耶大抵詩有三百
皆以聲別古人採詩之時隨其國而係之聖人無容
心於其間也至於稱其國之名號亦然如三監之地
自康叔得國已統於衛今其詩之在頃襄文武者亦

分而爲三不專曰衛唐叔封唐在燮父時已爲晉矣
至春秋時實有其詩今其目乃爲唐也七月以後多
爲周公作刺朝廷之不知今其詩乃皆爲豳豳大夫
在盤庚時商以爲殷故頌其殷武今其頌乃皆爲商
得於其地係於其國云耳聖人何容心哉嘗觀夫子
之論詩曰吾自衛反魯然後樂正雅頌各得其所夫
謂雅頌各得其所可也而謂樂正者何哉蓋樂者鄉
樂也鄉樂卽風詩也十五國風之中惟邶鄘衛其國
相近其聲相似不比周召王豳猶有隔絕也夫子平
時見魯太師所傳三國之聲時有異同及其環轍之

時見衛人所歌之聲從而正之故鄉樂曰正而雅頌但曰得所其意如此所以詩有十五此國風之別也

風有正變辯

風有正變仲尼未嘗言而他經不載焉獨出於詩序皆以美者爲正刺者爲變則邶鄘衛之詩謂之變風可也緇衣之美武公駟鐵小戎之美襄公亦可謂之變乎必不得已從先儒正變之說則當如穀梁之書所謂變之正也穀梁之春秋書築王姬之館于外書春秋盟于首戴皆曰變之正也蓋言事雖變常而終合乎正也河廣之詩曰誰謂河廣一葦航之其欲往

之心如其銳也然有舍之而不往者大車之詩曰穀則異室死則同穴其男女之情如是其至也然有畏之而不敢者氓之詩曰以爾車來以我賄遷其淫佚之行如是其醜也然有反之而自悔者此所謂變之正也序謂變風出乎情性止乎禮義此言得之然詩之必存變風何也見夫王澤雖衰人猶能以禮義自防也見中人之性能以禮義自閑雖有時而不善終蹈乎善也見其用心之謬行已之乖倘返而爲善則聖人亦錄之而不棄也先儒所謂風之正變如是而已

雅非有正變辯

二雅之作皆紀朝廷之事無有區別而所謂大小者序者曰政有小大故謂之大雅小雅然則小雅以蓼蕭為澤及四海以湛露為諸侯以六月采芑為北伐南征皆謂政之小者如此不知常武之征伐何以大於六月卷阿之求賢何以大於鹿鳴乎或者又曰小雅猶言其詩典正未至渾厚大醇者也此言猶未是蓋小雅大雅者特隨其音而寫之律耳律有小呂大呂則歌大雅小雅宜其有別也春秋襄公二十九年吳季札觀周樂歌大雅小雅是雅有大小已見於夫子未刪之前無可疑然無所謂正變者正變之言不出於夫子而出於序未可信也小雅節南山之刺犬雅民勞之刺謂之變雅可也鴻鴈庭燎之美宣王崧高烝民之美宣王亦可謂之變乎蓋謂詩之次第皆以後先為序文武成康其詩最在前故二雅首之厲王繼成王之後宣王繼厲王之後幽王繼宣王之後故二雅皆順其序國風亦然則無有正變之說斷斷乎不可易也詩之風雅頌亦然詩之六義未嘗有先後之別

子未刪之前無可疑然無所謂正變者正變之言不出於夫子而出於序未可信也小雅節南山之刺犬雅民勞之刺謂之變雅可也鴻鴈庭燎之美宣王崧高烝民之美宣王亦可謂之變乎蓋謂詩之次第皆以後先為序文武成康其詩最在前故二雅首之厲王繼成王之後宣王繼厲王之後幽王繼宣王之後故二雅皆順其序國風亦然則無有正變之說斷斷乎不可易也詩之風雅頌亦然詩之六義未嘗有先後之別

豳風辯

周召邶鄘衛王鄭洛邑齊豳秦魏唐陳檜曹此夫子未刪之前季札觀周樂國風之次第也周召邶鄘衛王鄭齊魏唐陳秦檜曹豳此今詩國風之次第十五國風初無增損或謂天子離衛降王進鄭退齊入魏與秦以一已之私揣摩聖人之意無是理也然聖人必以豳之風置之檜曹之下者何也蓋習亂者必思治傷今者必思古檜終於匪風思周道也曹終於下泉思治也天下後世苟有下泉之思治匪風之思周道則陳淫檜亂之治一變而復見豳風之正聖人序詩所以寓其變於十五國風之末者此也邶風邶雅

邶頌聖人以邶詩列於風雅之間謂其不純風而可以雅駸駸乎移風而即於雅也所以繫風之末居雅之前者此也或謂七月鴟梟之詩其言則雅其體則風雖非婦人女子之言實婦人女子之體也故列之風雅頌之間聖人有深意也齊魯衛三家之詩皆無七月篇或謂邶風七篇自鴟梟以下六篇皆非邶事獨七月一篇豈足以當一國之事周禮有邶雅頌豈不為有邶詩而今亡之乎故齊魯韓三家之詩皆無七月篇然則邶詩有亡者不可得而知之也周召王邶之風同出於周而分

風雅頌辯

風雅頌詩之體也賦興比詩之言也六義之序一曰

辨八種經 卷之八
風五曰雅六曰頌其後先次第聖人初無加損也三者之體正如今人作詩有律有呂有歌行是也風者出於土風大槩小夫賤隸婦人女子之言其意雖遠其言淺近重複故謂之風雅出於朝廷士大夫其言純厚典則其體抑揚頓挫非復小夫賤隸婦人女子能道者故曰雅頌者初無諷誦惟以鋪張勳德而已其辭嚴其聲有節不敢瑣語褻言以示有所尊故曰頌唐之平淮夷頌漢之聖主得賢臣頌效其體也然所謂風雅頌者不必自關雎以下方謂之風不必自鹿鳴以下方謂之小雅不必自文王以下方謂之大

雅不必自清廟以下方謂之頌程氏曰詩之六體隨篇求之有兼備者有偏得其一三者風之爲言有諷諭之意三百篇之中如文王曰咨咨爾殷商之類皆可謂之風雅者正言其事三百篇之中如憂心悄悄愠於羣小覲閔旣多受侮不少之類皆可謂之雅頌者稱美之辭如吁嗟麟兮吁嗟乎騶虞之類皆可謂之頌故不必泥風雅頌之名以求其義也亦猶賦詩而備比興之義焉

頌辯

陳休齋云頌者序其事美其形容以告於神明是其

詩專用於郊廟蓋鬼神之事戰國以下失之矣管仲
 有國頌屈原有謫頌秦人刻石頌功德漢有聖主得
 賢臣頌唐有磨崖中興頌以鬼神之事加之生人其
 弊如此余謂此說不然蓋頌者美其君之功德而已
 何以告神明乎既以敬之為戒成王小毖為求助與
 夫振鷺臣工閔予小子皆非告神明而作也不惟天
 子用之諸侯之臣子祝頌其君者亦得用故僖公亦
 有頌後世楊雄之頌充國陸機之頌漢功臣韓愈之
 頌伯夷鄭頌子產之不毀鄉校蓋有是為禮記載美
 哉輪焉美哉負焉君子稱其善頌善禱亦猶是也憑

詩之言而疑後世作頌之過非的論也

商魯頌辯

魯頌是僖公已歿之後序中明言季孫行父請命于
 周而史克作頌是頌有四篇皆史克作明矣閔宮曰
 新廟奕奕奚斯所作蓋奚斯作新廟耳非作頌也而
 漢斑固西都賦序其王延壽等靈光殿賦云奚斯反
 謂魯頌是奚斯所作商頌明言正考父得商頌十六
 篇於周之太師而太史公曰宋襄修行仁義其大夫
 正考父美之而作商頌此蓋出于韓詩以商頌出於
 春秋之世故為此說爾當漢之時詩之序未出宜乎

言詩者之牴牾也二頌之作當以序為正

逸詩辯 詩有笙奏金奏絲奏

貍首禮記射禮諸侯以貍首為節其下文云曾孫侯止四正具舉大夫君子凡以庶士小大莫處御于君所以燕以射則燕則饗鄭氏以為貍首之詩騶虞貍首采繁采蘋古之樂節也日用之間不可缺今貍首亡逸詩自逸非夫子逸之也觀貍首詩可見矣

驪駒前漢王武傳曰客歌驪駒注以為逸詩今大戴禮記客去

祈昭昭十二年周靈王好遊畋之樂子祭托於祭公謀父作祈昭之詩以正王心其詩曰祈昭之懃懃式昭德音思我王度式如玉式如金形民之力而無醉飽之心

麥秀史記箕子過故殷墟而傷之作麥秀漸漸兮禾黍油油兮彼狡童兮不與我好兮

河水僖二十三年晉文公在秦秦伯享之公賦河水杜註以為逸詩義取河水朝宗于海則春秋之世其詩猶存今無之矣

新宮燕禮升歌鹿鳴下管新宮商份曰管與笙類也

皆有聲而已故新宮詩亦亡昭二十五年宋公子
享昭子賦新宮謂之賦則有辭矣後漢明帝亦取
焉必見其辭故得之以播歌詠蓋未有有詩而無
詞者周禮祈年歛豳雅於管籥之類必得有辭
采薺咨古之人君行以肆夏步以采薺漢制宗廟樂
入廟門奏永至以為行步之節猶古采薺肆夏也
肆夏左傳金奏肆夏以之三謂三章國語云一右樊
君出入奏

玉夏王出入奏玉夏亦金奏

三夏國語云樊遏渠謂之三宮蓋繫鍾而奏此三曲

惟金奏故詩亦亡

九夏周朴鍾師之職奏九夏

王夏王出入奏肆夏尸出入奏亦名樊昭夏牲出入

奏一名遏納夏一名渠董夏 齊夏

族夏 械夏 敖夏皆金奏 鄭康成謂九夏皆

詩篇名頌之類今亡是以頌不能具焉

諸儒逸詩辯

論語云素以為絢兮唐棣之華備其反而豈不爾思
室是遠而舉碩人之詩而素以為絢兮之句不存閱
唐棣之詩而備其反而之語不載則詩之章句逸者

多矣如韓詩雨其無極傷我稼穡今亦不見於詩而無正篇無其辭齊魯韓詩並無七月篇

亡詩六篇

魚麗之後亡其三南陔白華華黍也南山有臺南有嘉魚之後亡其三由庚崇丘由儀也六篇之詩同在一處不應中間南有嘉魚南山有臺二詩獨能存也按儀禮鄉飲酒及燕禮笙入于縣中奏南陔白華華黍又曰間歌魚麗笙由庚歌南有嘉魚笙崇丘歌南山有臺笙由儀此六詩皆主於笙奏之商份曰所謂亡其辭者今論語亡字皆讀為無字謂此六詩於笙

奏之雖有其聲舉無辭句不若魚麗南有嘉魚南山有臺於歌奏之歌人聲也故有辭爾此歌與笙之異也辯曰古者有堂下堂上之樂歌主人聲堂上樂也笙鏞以間堂下樂也謂之笙鏞乃間歌之聲皆有義而無其辭東哲徽之補亡六詩皮日休補肆夏不知六亡詩乃笙詩肆夏乃金奏初無辭之可傳也

樂章圖

歌詩鄉飲酒燕饗皆用之魚麗間南有嘉魚間南山有臺間此三詩鄉飲酒燕禮用之歌鹿鳴燕禮升歌鹿鳴皇皇者華燕饗用之四牡已上六詩皆小

雅

合樂詩

關雎 葛覃 卷耳 鵲巢 采蘋

已上皆二南合為樂詩夫子所謂人而不為周南
召南者以此

射樂即樂節古者諸侯之射也必先行燕禮卿大夫

射必先行鄉飲酒禮騶虞王 貍首侯 采蘋大夫 采蘩

士周禮樂師凡射王以騶虞為節諸侯以貍首為

節大夫以采蘋士以采蘩為節今召南詩中有采

蘩采蘋騶虞三詩而貍首獨亡已上三詩皆召南

笙詩鄉飲酒燕射用之又云升歌三終笙入三終間

歌三終合樂三終 南陔笙 由庚間笙 崇由間笙

由儀間笙 皆小雅逸詩為六笙歌

管奏管與笙一類皆竹吹之獨燕禮升歌取鹿鳴下

管新宮自春秋至後漢猶存今亡注見逸詩

金奏肆夏 三夏 王夏 九夏皆金奏即頌詩之

類見逸詩

絲奏三百篇中之詩皆可被之絃歌故琴中有鵲巢

操騶虞伐檀操白駒操皆今詩文又古人謂之雅

琴頌琴古之雅頌即今之琴操琴古禁也將以禁

人之邪心故以歌乎詩如文中子歸而援琴鼓蕩

蕩之什乃知聲至隋末猶存

房中之樂二南詩用之爲房中之樂周有房中樂漢有房中詞樂唐山夫人作高祖樂用楚聲故房中樂楚聲也

兩君相見之樂文王大明縣辯曰春秋戰國以來諸侯卿大夫士賦詩道志者凡詩雅雜取無擇至考其入樂則自邶鄘至豳無一詩在數或曰周禮篇章吹豳詩豳雅豳頌則豳疑於入樂矣然聽吹雅頌而無豳風非今七月等語此歐陽文忠公疑其別有豳詩于今不存也

刪詩辯

司馬遷云古者詩三千餘篇夫子取其可施於禮義者三百篇孔穎達曰按書傳所引之詩見在者多亡逸者少則夫子所錄不容十分去九夫詩上自商頌祀成湯下至株林刺陳靈公上下千餘年而詩纔三百五篇有更十君而取一篇者皆商周人所作夫子併得之於魯太師編而錄之非有意於刪也夫迢迢車乘招我以弓豈不欲往畏我友朋如斯等語亦不俚也胡爲而刪之乎墻有茨桑中等語至俚又胡爲而不刪之乎則知刪詩之說與春秋始隱終獲麟之

事皆漢儒倡之也大抵得其鄉聲則存不得其聲則不存也周之列國如滕薛如許蔡如邾莒等國夫豈無詩但魯人不識其音則不得其詳季札聘魯魯人以雅頌之外所得十五國風盡歌之及觀今三百篇於季札所觀與魯人所存無加損也若夫夫子有意刪詩則當環轍之時必大搜而備索之奚止十五國乎然聖人不欲強備者何也蓋以天下情性美刺諷誄亦不過是也刪之之說非夫子本意漢儒孔安國倡之文中子極筆載之善乎邵康節詩曰自從刪後更無詩康節之詩非謂夫子果刪詩也蓋謂天下情性不出乎此求之三百篇之中足矣不必外有所求也

詩序辯

序作於衛宏

漢興四家之詩毛詩未有序惟韓詩以序傳於世齊詩無序魯詩之序有無未可知詩之序大槩與今序異韓詩得序而益明漢儒多宗之如司馬遷楊雄范曄之徒皆以二南作於周衰之時此韓學也毛詩至衛宏為之序鄭玄為之註而毛氏之學盛行又非韓所敢望也或者謂大序即關雎序作于子夏王肅鄭玄小序作於毛公此說非也序有鄭註而無鄭箋其不作

於子夏明矣毛公於詩第爲之傳其不作序又明矣
又謂大序作於聖人小序作於衛宏謂小序作於衛
宏是也謂大序作於聖人非也命篇太序蓋出於當
時採詩太史之所題而題下之序則衛宏從謝曼卿
受師說而爲之也按後漢儒林傳云衛宏字敬仲從
謝曼卿學毛詩因作毛詩序善得風雅之旨于今傳
於世蓋嘗謂詩之大序非一世一人之所能爲採詩
之官本其得於何地審其出於何人究其主於何事
且有實狀然後致之太師上之國史是以取發端之
二字以命題故謂大序是當時採詩太史之所題詩

之小序序所作爲之意其辭顯者其序簡其辭隱者
其序備其善惡之微者序必明著其迹而不可以言
殫者則亦闕其目而已故謂小序是宏誦師說而爲
之或者又曰序之之辭委曲明白非宏所能爲曰使
宏鑿空爲之雖孔子亦不能使宏誦詩說爲之則雖
宏有餘矣意者毛氏之詩歷代講師之說至宏而悉
加詮次焉今觀宏之序有專取諸書之文至數句者
有雜取諸家之說而辭不堅決者有委曲宛轉附經
以成其義者情動於中而形於言言之不足故嗟歎
之其文全出於樂記成王未知周公之志公乃爲詩

以遺王其文全出於金縢自微子至於戴公其間禮樂廢壞其文全出於國語古者長民衣服不貳從容有常以齊其民其文全出於公孫尼子則詩序之作實在於數書既傳之後明矣此所謂取諸書之文有至數句者此也關雎之序既曰風之始也所以風天下而正夫婦也意亦足矣又曰風風也風以動之上以風化下下以風刺上又曰一國之事係一人之本謂之風載馳之詩既曰許穆夫人閔其宗國顛覆而作又曰衛懿公爲狄所滅綠衣之詩既曰釋賓尸矣又曰靈星之尸也此蓋衆說並傳衛氏得其美辭美

意併錄而不忍棄之此所謂雜諸家之說而辭不堅決者也騶虞之詩先言人倫既正朝廷既治天下純被文王之化而後繼之蒐田以時仁如騶虞則王道成行芻之詩先言國家忠厚仁及草木然後繼之以內睦九族外尊事黃耆養老乞言此所謂委曲宛轉附經以成其義者也宏序作於東漢故漢世文字未有引詩序者惟黃初四年有曹共公遠君子近小人之語蓋魏後於漢而宏之序至是而始行也使其果知詩序出於衛宏則風雅正變之說二南分係之說羔羊蟋蟀之說或鬱而不暢或巧而不合如蕩以蕩

蕩上帝發語而曰天下蕩蕩無綱紀文章召旻以旻
天疾威發語而曰閔天下無如召公之爲臣雨無正
乃大夫刺幽王也而曰衆多如雨非所以爲正也牽
合爲文而取譏於世此不可不辯也

詩箋辯

張華博物志曰聖人制作謂之經賢者著述謂之傳
孔毛左氏鄭氏註毛詩而曰箋不解此意孔穎達云箋表
也識也鄭氏以毛詩悉備遵暢厥旨所以表明毛意
紀識其事故特稱箋餘注無所遵奉故謂之注歐陽
永叔深排鄭學以爲多喜改字永叔未深考耳漢時

四詩並作文字各有不同雖三家不如毛詩之密然
不可謂無所長也鄭氏箋詩傳意有不同者以已說
易之經文有不安者以三家易之證之他書則可知
矣吉蠲爲饁鄭氏以蠲爲圭吉圭爲饁則韓詩之言
也素衣朱褌鄭氏以褌爲緇素衣朱緇則齊詩之言
也其耕澤澤鄭氏以澤爲釋其耕釋釋亦爾雅之言
也舟人之子鄭氏以舟當作周周人之子則朱育集
字之言也艷妻扇方處鄭氏以艷爲閭閭妻扇方處
則漢杜欽傳之言也當鄭氏箋詩三家俱存故鄭氏
雖解釋經文不明言改字之由亦以學者既習詩則


三家之詩不容不知也後世三家既亡學者惟見其
改字而不見詩學之所由異此鄭氏之所以獲譏也
則鄭於經不謂之注而謂之箋箋之爲言魏晉間所
以致辭於皇太子諸王者也鄭嘗以君師之禮待毛
公而不擅改聖人之經明矣觀其注禮記玉藻雜記
顛倒不倫之處鄭雖理之使條貫亦不敢易其先後
姑於注下發明而已則其改字不出臆見愈可信矣
古詩云讀書不到康成處不敢高聲論聖賢吾於鄭
氏詩箋見之矣

讀詩法

詩三百篇皆可歌可誦可舞可弦大師世傳其業以
教國子自成童至既冠皆往習焉誦之則習其文歌
之則識其聲舞之則見其容弦之則寓其意春秋以
下列國君臣朝聘燕享賦詩見志微寓相諷鮮有不
能答者以詩之學素明也後之弦歌與舞者皆廢直
誦其文而已且不能言其義故論者多失詩之意夫
文章之體有二有史傳之文有歌咏之文史傳之文
以實錄爲主秋毫之善不私假人歌詠之文揚其善
而隱其惡大其美而張其功後世欲求歌詠之文太
過直以史視之則非矣孝經十八章其及於詩者十

中庸孟子所以善言詩者以其無漢儒之說亂之也
蓋嘗論之善觀詩者當推詩外之意如孔子子思善
論詩者當達詩中之理如子貢子夏善學詩者當取
一二言爲立身之本如南容子路善引詩者不必分
別所作之人所採之詩如諸經所舉之詩可也綿蠻
黃鳥止于丘隅綿蠻不過喻小臣之擇卿大夫有仁
者依之夫子推而至於爲人君止於仁與國人交止
於信鳶飛戾天魚躍于淵旱麓不過喻惡人遠去而
民之喜得其所子思推之上察乎天下察乎地觀詩
如此尚何疑乎如切如磋如琢如磨淇澳而子貢能

達之於貧富之間巧笑倩兮美目盼兮碩人而子夏
能悟於禮後之說論詩若此尚何疑乎南容三復不
過白圭抑子路終身所誦不過不伎不求雄雉學詩
至此奚以多爲維岳降神生甫及申崧高宣王詩也
夫子以爲文武之德夙夜匪懈以事一人仲山甫詩
也左氏以爲孟明之功小宛幽之詩也祭父以爲文
王戎狄是膺荆舒是懲僖公詩也孟子以爲周公矢
其文德洽此四國江漢記禮者以爲天王之事明明
天子令聞不已江漢記禮者以爲三代之君引詩若
此奚必分別所作之人所採之詩乎達是詩然後可



以言詩也不然周餘黎民靡有子遺信其爲子遺矣
崧高維嶽峻極于天信其爲極矣必欲以實迹驗之
則不可以言詩善乎孟子之言詩可謂長於詩矣詩
曰民之秉彜好是懿德孟子從而釋之曰民之秉彜
也故好是懿德而已未嘗費辭而理自明故橫渠有
詩曰置心平易始知詩揚中立見之曰知此詩者可
以讀三百篇矣信哉言乎

詩有美刺

詩有美刺美詩作於文武成康之世歌詠太平而不
顯作者之名而况刺詩當王室衰微諸侯橫恣譏訶
醜亂之跡暴揚帷幄之私則其隱晦姓名宜愈甚矣
是以作詩者不明著其人亦不直指其事惟節南山
刺幽王也則曰家父作誦以究王凶巷伯寺人傷讒
而作也則曰寺人孟子作爲此詩祈父詩曰祈父予
王之爪牙烝民詩曰吉甫作誦穆如清風如此則明
著其所作之人其他諸詩有美刺者不可以言語求
必將觀其意可矣故其譏刺是人也
不言其所爲之
惡而言其爵位之尊服飾之美而民疾之以見其不
堪也君子偕老副笄六珈赫赫師尹民具爾瞻是也
其頌美是也不言其所爲之善而言其冠佩之華

容貌之盛而民安之以見其無媿也緇衣之宜兮敝
予又改爲兮服其命服朱芾斯皇是也後世惟孟子
言齊王鼓樂田獵深識此意觀其言曰百姓聞王鍾
鼓管籥之音車馬羽毛之美其譏之則曰舉疾首蹙
額而相告曰吾王之好鼓樂田獵夫何使我至於此
極也其美之則曰舉欣欣然有喜色而相告曰吾王
庶幾無疾病歟何以能鼓樂田獵也正得此意孟子
長於詩故其言自與詩合

毛鄭之失

朱子辨之詳矣此宜參看

何彼穠矣之詩平王以後之詩也注以爲武王之詩

而謂平王爲平正之王齊侯爲齊一之侯按春秋莊
公元年書王姬歸于齊乃桓王女平王孫下嫁於齊
襄公故詩曰齊侯之子平王之孫斷無疑周頌作於
康王成王之世故稱成王康王今毛鄭以頌皆成王
時作不應得稱成王康王故此昊天有成命云成王
不敢康爲成此王功不自安逸執競之不顯成康謂
成大功而安之噫嘻之成王謂成是王事惟以召南
爲文武之詩故不得不以平王爲平正之王惟以周
頌爲成王時作故不得不以成王爲成此王功也殊
不知書中此類甚多召南中有康王以後之詩有平

三以後之詩不特文武時也甘棠行露之美召公既
沒之後在康王世也何彼穠矣作於平王已後亦猶
是也不必謂武王詩大雅中大明之維此文王思齊
之文王之母皇矣之比于文王靈臺之王在靈沼鯉
之文王蹶厥生皆後世詩人追詠之辭何嘗作于文
王之世周頌之美成王亦猶是也不必謂成王時作
毛鄭解經不能無失孰有大於此者故特舉一二言
之

詩亡然後春秋作

明文定公曰邶鄘以下多春秋詩而謂詩亡然後春

秋作何也黍離降而爲國風天子無復有雅而王者
之詩亡矣春秋始隱公適當詩亡之後謂詩亡者雅
詩亡也予謂不然春秋作於獲麟之時乃哀公十四
年矣詩亡於陳靈公乃孔子未生之前故曰詩亡然
後春秋作謂美刺之詩亡而褒貶之書作矣非有定
義也

秦以詩廢而亡

陳君舉曰春秋之衰以禮廢秦之亡以詩廢嘗觀之
詩刑政之苛賦役之重天子諸侯朝廷之嚴而后妃
夫婦在席之秘聖人爲詩而使天下匹夫匹婦之微

皆得以言其上宜若啟天下輕君之心然亟諫而不
悟顯戮而不戾相與携持去之而不忍是故湯武之
興其民急而不敢去周之衰其民哀而不敢離蓋其
抑鬱之氣紆而無聊之意不蓄也嗚呼詩不敢作天
下怨極矣卒不能勝共起而亡秦秦亡而後快於是
始有匹夫匹婦存亡天下之權嗚呼春秋之衰以禮
廢秦之亡以詩廢吾固知公卿大夫之禍速而小民
之禍遲而大而詩者正所以維持君臣之道其功用
深矣

序草木類兼論詩聲

鄭樵通志序

學者皆操窮理盡性之說而以虛無爲宗至於實學
則置而不問當仲尼之時已有此患故曰小子何莫
學夫詩詩可以興可以觀可以羣可以怨邇之事父
遠之事君多識於鳥獸草木之名其曰小子者無所
識之辭也其曰何莫者苦口之辭也故又曰人而不
爲周南召南其猶正牆面而立此苦口之甚也一部
論語言他書不過一再惟詩則言之又言凡十二度
言焉門弟子有能學詩者則深喜之子貢子夏在孔
門未爲高弟至於論詩則與之至于夏又發起予之
嘆者深嘉之也夫樂之本在詩詩之本在聲竊觀仲

荆川雜錄 卷之六
尼初亦不達聲至哀公十一年自衛反魯質正於太師氏而後知之故曰吾自衛反魯然後樂正雅頌各得其所此言詩爲樂之本而雅頌爲聲之宗也其曰師摯之始關雎之亂洋洋乎盈耳哉此言其聲之盛也又曰關雎樂而不淫哀而不傷此言其聲之和也人之情聞歌則感樂者聞歌則感而爲淫哀者聞歌則感而爲傷惟關雎之聲和而平樂者聞之而樂其樂不至於淫哀者聞之而哀其哀不至於傷此關雎所以爲美也緣漢人立學官講詩專以義理相傳是致衛宏序詩以樂爲樂得淑女之樂淫爲不淫其色

之淫哀爲哀窈窕之哀傷爲無傷善之傷如此說關雎則洋洋盈耳之旨安在乎臣之序詩於風雅頌曰風土之音曰風朝廷之音曰雅宗廟之音曰頌而不曰風風者教也雅者正也言王政之所由廢興也頌者美盛德之形容也於二南則曰周爲河洛召爲岐雍河洛之南瀕江岐雍之南瀕漢江漢之間二南之地詩之所起在於此屈宋以來騷人墨客多生江漢故仲尼以二南之地爲作詩之始而不曰南言化自北而南於王黍離豳七月則曰王爲王城東周之地豳爲豳豐西周之地七月者西周之風黍離者東周

之風而不曰黍離降國風臣之序詩專爲聲歌欲以
明仲尼之正樂臣之釋詩深究鳥獸草木之名欲以
明仲尼教小子之意然兩漢之言詩者惟儒生論義
不論聲而聲歌之妙猶傳於瞽史經董卓赤眉之亂
禮樂淪亡殆盡魏人得漢雅樂即僅能歌文王鹿鳴
騶虞伐檀四篇而已太和之末又亡其三惟有鹿鳴
至晉又亡自鹿鳴亡後聲詩之道絕矣夫詩之本在
聲而聲之本在興鳥獸草木乃發興之本漢儒之言
詩者既不論聲又不知興故鳥獸草木之學廢矣若
曰關關雉鳴在河之洲不識雉鳴則安知河洲之趣

與關關之聲乎凡雁鴛之類其喙扁者則其聲關關
雞雉之類其喙銳者則其聲鷦鷯此天籟也雉鳴之
喙似鳧雁故其聲如是又得水邊之趣也小雅曰呦
呦鹿鳴食野之苹不識鹿則安知食苹之趣與呦呦
之聲乎凡牛羊之屬有角無齒者則其聲呦呦駝馬
之屬有齒無角者則其聲蕭蕭此亦天籟也鹿之喙
似牛羊故其聲如是又得萋蒿之趣也使不識鳥獸
之情狀則安知詩人關關呦呦之興乎若曰有敦瓜
苦蒸在栗薪者謂瓜苦引蔓於籬落間而有敦然之
繫焉若曰桑之未落其葉沃若者謂桑葉最茂雖未

芥川和編 卷之八
落之時而有沃若之澤使不識草木之精神則安知
詩人敦然沃若之興乎陸機者江左之騷人也深爲
此患爲毛詩作鳥獸草木蟲魚疏然機本無此學但
加採訪其所傳者多是支離自陸機之後未有以此
明詩者惟爾雅一種爲名物之宗然孫炎郭璞所得
既希張揖孫憲所記徒廣大抵儒生家多不識田野
之物農圃人又不知詩書之旨二者無由參合遂使
鳥獸草木之學不傳惟本草一家人命所係凡學之
者務在識真不比他書只求說也神農本經有三百
六十以應周天之數陶弘景隱者也得此一家之學

故益以三百六十以應周天之數而兩之臣少好讀
書無涉世意又好泉石有慕弘景心結茅夾漈山中
與田夫野老往來與夜鶴曉猿雜處不問飛潛動植
皆欲究其情性於是取陶隱居之書復益以三百六
十以應周天之數而三之已得鳥獸草木之真然後
傳詩已得詩人之興然後釋爾雅今作昆蟲草木略
爲之會同庶幾衰晚少備遺忘豈敢論實學也夫物
之難明者爲其名之難明也名之難明者謂五方之
名既已不同而古今之言亦自差別是以此書尤詳
其名焉

荆川先生稗編

卷之八

終

新刊唐荆川先生稗編

卷之八終

